

**Aatsitassanut tunngasut taassumalu iluani Kalaallit Nunaata imartaani nunavittaani
uuliasiorfiliani sullivinnik isumannaallisaanermut akisussaaffiup tiguneqarnissaanik
Inatsisartut aalajangiivigisassaattut siunnersuut
(Inuussutissarsiornermut Aatsitassanullu Naalakkersuisoq)**

pillugu

Inuussutissarsiornermut Ataatsimiititaliap

ISUMALIUTISSIISSUTAA

**Inatsisartut aalajangiivigisassaattut siunnersuutip aappassaaneerpeqarneranut
saqqummiunneqartoq**

Inuussutissarsiornermut Ataatsimiititaliaq suliarinninnermini ukuninnga ilaasorta qarpoq:

Inatsisartunut ilaasorta, Aqqaluaq Egede, siulittaasoq, Inuit Ataqatigiit
Inatsisartunut ilaasorta, Niels Thomsen, siulittaasup tullia, Demokraatit
Inatsisartunut ilaasorta, Juliane Henningsen, Inuit Ataqatigiit
Inatsisartunut ilaasorta, Sivert K. Heilmann, Atassut
Inatsisartunut ilaasorta, Bitten Høgh Dam, Siumut

Siunnersuutip siullermeerneqarnera

Aalajangiivigisassatut siunnersuutip siullermeerneqarnerani siunnersuutip imarisaata siunertaatalu partiinit tamanit tamakkiisumik isumaqatigineqarnera Ataatsimiititaliap maluginiarpa. Inatsisartuni partiinit tamanit siunnersuutip erseqqissumik isummerfigineqarnera taparserneqarneralu tunngavigalugit, Ataatsimiititaliaq siunnersuut pillugu marlussuinnarnik naatsunik oqaaseqaatissaqarpoq.

Siunnersuutip imarisai.

Matumani Inatsisartut aalajangiivigisassaattut siunnersuutikkut aatsitassanut tunngasunut suliassa qarfiup, taamatullu aamma sullivinni avatangiisinut tunngasunut suliassa qarfiup ilaata imartani Kalaallit Nunaata oqartussaaffigisaani, taamatullu aamma Kalaallit Nunaata nunavittaata ilaani immap naqqaniittumi, uuliasiorfilianut tunngasup tiguneqarnissaannik kissaateqarlutik Namminersorlutik Oqartussat Naalagaaffimmi oqartussanut nalunaaruteqarnissaamik Inatsisartunit piginnaatinneqarnissartik Naalakkersuisut anguniarpaat.

Suliassaqarfinnik taaneqartunik tiguserup qaqugu pinissaa Naalagaaffimmut sukumiinerusumik isumaqatigiinniutigineqartussaavoq. Naalakkersuisut siunniuppaat tiguseq ulloq 1. januar 2010-miit atuutilersumik pisinnaassasoq.

Ataatsimiititaliap siunnersuummik suliarinninnera

Ataatsimiititaliap maluginiarpaa aalajangiivigisassatut siunnersuummut matumunnga atatillugu nalilersuinerit apeqqutillu pingaernerit tamarmik siunnersuutip siullermeerneqarnerani partiinit saqqummiunneqarsimasut. Isummat oqaaseqaatillu partiit oqaaseqartuinit saqqummiunneqartut Ataatsimiititaliap isumaqatigai, pissutissaqartinnagulu taakku qaavisigut sukumiinerusumik oqaaseqarnissaq saqqummiunneqareersunilluunniit uteqqiinissaq. Ataatsimiititaliap maluginiarpaa aatsitassanut tunngatillugu pissutsit assigiinngitsut pillugit partiit arlallit oqaaseqarnermini apeqquteqartut. Ataatsimiititaliap Naalakkersuisut qinnuigaat partiinit apeqqutit pineqartut siunnersuutip matuma aappassaaneerneqarnerani akissuteqarfigeqqullugit.

Ataatsimiititaliap inassuteqaataa

Ataatsimiititaliap isumaqatigiittup siunnersuutip **akuersissutigineqarnissaa inassutigaa.**

Taamatut oqaaseqarluni siunnersuullu paasilluarlugu Inuussutissarsiornermut Ataatsimiititaliap taamaalilluni aappassaaniigassanngortippaa.

Siulittaasoq

Siulittaasup tullia